

**Date – 04/06/2025**

**Time - 7:30 -7:40Hrs**

**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

- 1. Kawlphetha pekchhuahna khawl te siamthat zel a ni a, Aizawl khawpui bikah harsatna dang a awm loh chuan vawiin hian power pek kim theih beisei a ni.
- 2. PHE Dept chuan khuarel chhiatna avangin Aizawl khawpui chhung tui semna lamah harsatna a tawh a, tui an sem mumal thei rih lo tih an sawi.
- 3. Hmarchhakah tuilian leh leiminin zual lam a pan zel.
- 4. Sawrkar laipui tirh Parliamentary Delegates 7 zinga pahnihte chuan nimin khan India an lo thleng leh tawh.

.



**POWER SUPPLY**

Khuarel chhiatna in kawlphetha pekchhuahna khawl a tih chhiat hnuah 33kV North Bukpui Sub Station tih loh chu Sub-Station zawng zawng atangin power an dawng kim tawh a, North Bukpui Sub-Station pekna line pawh endik mek a ni a, hun reiloteah power pekchhuah theih beisei a ni.

Nimin khan Power & Electricity Department Minister Pu F Rodinglana ho in P&E Department officer-te nen Minister office chamber-ah kawlphetha chungchang hi ngaihtuah a ni a, khaw thenkhat power supply pekchhawna feeder thenkhat line chhia pawh a tahtawlin siamthat mek zel a nih thu tarlan a ni.

Distribution transformer chhiate pawh thlak mek zel a ni a, vawiin hian transformer 5 pekchhuah thu tarlan a ni a. Aizawl khawpui bikah khaw chhia leh harsatna dang a awm loh chuan vawiin hian power pek kim theih beisei a ni.

Hetihlai hian Zuangtui leh Bukpui inkar 132 KV line load tam zawk keng thei HTLS conductor-a thlakna tur leh Mizoram chhung hmun hrang hranga Sub-station 7 - Bawktlang, Saitual, Melriat, Khawzawl, Champhai, Serchhip Bukpui, East Lungdar Transformer lian zawk dahna tur cheng vaibelchhe 47 leh nuai 87 chu DONER in an rawn pekchhuak tawh thu tarlan a ni a. He project hi zawh a nih chuan Zuangtui leh Bukpui (Serchhip) inkar a MW 80 chauh load la thei thin kha 200MW thleng load an la thei toh dawn a ni. Hei hi Saitual District, Khawzawl District, Champhai District leh Serchhip District ten an tangkai pui hle dawn a ni tih Minister chuan a sawi a ni.

(DIPR)



WATER SUPPLY

PHE Dept chuan khuarel chhiatna avangin Aizawl khawpui chhung tui semna lamah harsatna a tawk a, tui an sem mumal thei rih lo tih an sawi.

Hemi chungchanga thuchhuah an siamah, tun hnai ruahsur nasa avanga Tuilian leh tui nu nasa lutuk avangin Aizawl khawpui chawmtu Greater Aizawl Water Supply Scheme (GAWSS) Phase - I & II te chu kar kalta zirtawpni atang khan Tui pump theih a ni lo a. Power Transformer lam that loh bawk avangin GAWSS – III, Setlak atangin Tui a pump theih lo bawk a ni.

Vaivakawn – Zohnuai lei tlakhniamna hmunah GAWSS – III tui pump-na Pipe atangin thawhtanni atang khan nasa takin tui a lo chhuak a. Tui pump loh lai a nih avangin hetiang tui lo chhuak vak mai hi a chhan hriatthiam a har in helaia cheng mipui te an ralkhel hle tih hriat a ni a, pawl hle a ni an ti a, Kar kalta zirtawpni khan Zemabawk South (NH 54) kawngchhak lam inhmun laihna hmunah nasa takin lei a min a, he leimin hian a chhak tlang, Beraw Tlang panna kawng hrula kal Assam Rifles leh Lungbial mipui te tui pekna Pipe line a hnawl chhia a. Hemi a nih vangin tun thlengin tui supply theih ala ni lo a, Pipe line siamthat hna ngawrh taka thawh mek a ni bawk.

Heng chhan hrang hrang avang hian khawpui chhungah tuisem mumal theih a ni lova. Khaw chin leh tui dinhmun hrang hrangte thlirin pangngai taka tui sem leh theih hun tur hi chiang taka sawi theih a ni lo tih PHE Dept chuan sawiin ruahtui dahkhawl lamah tan lo la zel turin mipui a chah a ni.

(PR)



WEATHER

Fur ruahtui a tlak nasat avangin Mizoram sawrkar chuan, sawrkar laipui leh state dang atanga mi pawimawh lo zin turte chu, tun thla June 13 hnulam hun remchang dang lo ruahman hram turin a ngen a ni.

Mizoram state pumah ni eng emaw zat chhung ruah nasa tak a sur avangin chhiatna hrang hrang, leimin, lungrem chim, lung tla, tuilian leh saberekakhuangkaih te a thleng a, nunna hial chan phahte an awm bawk a. He khuarel chhiatna thleng mek avang hian District hrang hrangah mipui nunphung a buai phah nasa hle a, District tina Deputy Commissioner-te kaihhruaina hnuaiah District Disaster Management Authority (DDMA) te chuan chhiatna thlenna hmun te urhsun taka vilin chhiat tawkte chhawmdawl hna ngawrh takin an kalpui mek zel a. Hetiang hi thil awmdan a nih avangin District-a hruiatute chuan ram pawn atanga VIP lo zinte pawh, lo mikhual leh lo dawnawn kawngah harsatna an tawk tih sorkar thuchhuah chuan a sawi a ni.

Indian Meteorological Department (IMD), Regional Meteorological Centre, Guwahati-in a puan lawk danin, thlipui leh ruahpui thawk reng thei dinhmunah Mizoram chu a lan avang leh chhiatna thleng mek leh thleng zel theite thlirin, mipui

him tlan zawk nan leh chhanchhuah leh chhawmdawl hnate chak zawka hlenchhuah a nih theih nan hetiang a thuchhuah siam hi a nih thu sorkar chuan a sawi a ni.

(DIPR)

<><><>

KOLASIB DC

Tunlai ruahsur vanga Bairabi leh a chhehvel, a bikin Tlawng dung a chengte, tui chim chin san avanga hmun him lama insaseng ngaite dinhmun enthlithlai leh Bairabi a Sawrkar hmun pawimawhte en turin Kolasib DC Pu Robert C Lalhmangaiha chuan nimin khan Bairabi a tlawh a.

Bairabi ah hian tuilian avang hian chenna in rauhsan leh bungraw senghawi ngai engemawzat awm in, chenna in atanga insuan chhuak a hmun him lam pan (Relief Camp) a khawsa chhungkaw 25 an awm bawh a ni.

Tlawng lui hian kiam lam pan zelin tun dinhmunah hlauthawnawm a awm rihlo a ni.

DC hian tuilian avanga harsatna tawkte dinhmun leh enkawl zel dan tur khawtlang hruaitute a sawipui zawh hian Bairabi a sawrkar hmun pawimawh; ILP Checkgate, Railway Station, FCS Godown te a tlawh nghal bawh a ni.

(ANDREW KOLASIB PTC)

<><><>

OCULAR TRAUMA

Aizawl Civil Hospital-a Eye Dept a Head of Dept Dr Lalhuthangi Hmar chuan mit enkawl uluk a pawimawh tih sawiin mita bawlhhlawh a luhin nuai mai loa tua fai taka sil a pawimawh a ti.

Dr Lalhuthangi Hmar chuan mit hliam palha thi a chhuak anih chuan doctor pan vat tur a ni a ti a, mitmu dum hmaa mit darthlalangah bawlhhlawh a tang a nih chuan doctor pan tur a ni a, rei rial loh tur a ti a ni.

Hliam a awm hrim hrim chuan tihfai a, a theih chuan antibiotic eyedrop, thingtlangah chuan gentamycin eyedrop tih te a thlawr theih a ni a ti a, superglue ang chi te chu sil bawrh bawrh tur a ni a, mahnia enkawl tur a ni lo a ti a, heng bakah hian Grinder leh Welding khawih zingah thir them a lut duh thin tih sawiin fimkhur a ngai hle a ti a, hengah hian mit chu nuai mai lo tur leh tua sil fai a pawimawh tih sawiin a fiah theih mai loh chuan Doctor rawn vat a pawimawh tih a sawi.

Mithiam te sawi danin mita bawlhhlawh leh thir them awm hi lak chhuah lohva rei tak a awm chuan mit ulcer a thlen thei a, heng bakah hian tauh palh emaw accident emaw avanga mit meng theilo ten enkawl na tha tak an hmuh theih nan doctor pan vat a pawimawh hle a ni.

(Corr)



**IDY**

Rilru leh taksa hrisel nei tura khawvel pum huapa Yoga insawizawina inzirtirna kalpui mekah, International Day of Yoga chu tun thla ni 21 a hmang turin inbuatsaihna kalpui mek a ni a,

Kumin IDY thupui atan hian Yoga for One Earth, One Health tih hman a ni dawn a. Yoga hi sorkar laipuiin a ngaipawimawh hle a, India rama State tinah International Yoga Day hi hmang tura ruahmanna kalpui mek a ni. Mizoram ah chuan Directorate of Ayush leh 1 Mizo Sqn NCC te ruahmanna in Aizawl ah hman tum a ni a, inpuahchah kalpui mek a ni.

Directorate of Ayush, National Ayush Mission hnuaia Yoga Instructor Pi Hmingthantluangi chuan Yoga chu damdawi ei ngailoa mahni hriselna enkawl nan a tangkai hle a ni a ti a, tunlai natna buaipui awm tak non communicable disease hrang hrang BP sang, Zunthlum taksa na leh rilru hah vanga natna miin an vei thin te enkawl nan Yoga chu a tha hle ani a ti a. Yoga a thawk lak dan insawizawina chu mihring taksa boruak tha hip luh dan inzirtirna a ni a ti a, chuap leh rilru lama natna nei te tan damdawi tha tak a ni ati.

Pi Hmingthantluangi chuan Yoga chu hnamdang tih atan chauh khek loa, Mizorama cheng Mizote ngei pawh in ti ve thin tura a duh bakah mipuite chuan yoga chu lo hmang tangkai theuh tur in a sawm.  
(Byte of Pi Hmingthanmawii)

(CORR-Chawnga)



**MZP PR**

Mizo Zirlai Pawl MZP General Headquarters thutkhawm hmanhmawh nimina an kohah Health Department peng pakhat NHM hnuaia hna hrang hrang lakah, Advertisement leh dan tlawhchhan awm mumal loa hna lak a awm ngei tih sawiin, tun thla ni 10 ral hma ngeia heng hna lakte hi sut nghal turin sawrkar an ngen a ni.

MZP chuan tunhnaia Health Department hnuaia hnalakah, Advertisement pawh chhuah loa, duhsak zawngte lak an awm tih thuthang a hriat veleh theih ang angin a chhui nghal an ti a. National Health Mission (NHM) hnuaia post 7; Lab. Technician- 3, Staff Nurse- 2, Asst. Data Manager-1 leh Executive Asst.- 1 te chu Advertisement tello a lak ngei an ni an ti. NHM hnuaia dan dik taka hna lakte chu, an website-ah awlsam taka en leh hmuh theih a nih lain, tuna mi te chu tarlang lovin a ruk a rala lak ngei tih a chiangah MZP chuan a ngai a ni, an ti.

Thalaite rilru tina tu leh, ti hnual thei zawnga hmalakna hi engti kawng pawhin a enliam dawn lo a, tuna Health Department-in NHM hnuaia hna pasarih lai Advertisement pawh chhuah loa an lo lak tawh chu sut nghal a phut a ni, an ti.

(PR)



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



NE

Hmarchhakah tuilian leh leiminin zual lam a pan zel a. Prime Minister Narendra Modia chuan chhanchhuah hna leh chhawmdawl hna kalpui mekte uluk taka vilin sawrkar laipuiin a puih tur thu a sawi.

Assam ah chuan mi nuai 5 chuanguin tuilian an tawh a. Assam state Disaster Management Authority sawidanin tuilian leh leimin avanga chhiatna thlengah mi 11 an thi a. Prime Minister Modia chuan Assam Chief Minister Himanta Biswa Sarma chu phone-a biain tuilian dinhmunte a zawt a ni.

Chief Minister Himanta Biswa Sarma leh a cabinet minister te bakah MLA ten chhiatna thlenna hmunte tlawhin uluk takin an vil reng a. Nimin khan CM Sarma hian Silchar tlawhin tuilian dinhmun a enfiah a. Hmun hrang hranga chhawmdawl na camp siamte a tlawh bawh a. Tuilian hian Kaziranga National Park and Tiger Reserve-ah camp 233 zinga 53 chu tuilian hian a chim a. NF Railway hian Silchar-Agartala Express, Silchar-Vangaichungpao passenger train leh Silchar-New Delhi express te a titawp rih a ni.

Prime Minister Modia hian Sikkim Chief Minister Prem Singh Tamang a be bawh a. Lachen-a sipai camp leiminin a hnawh chungchang a zawt a. Thudawn danin Sikkim hmarlama leiminah hian mi 34 34 nimin khan lakchhuah an ni a. Vawiin lamah chhanchhuah hna thawh chhonzawm a ni ang.

Manipur ah chuan Imphal East district ah thingtlang khua 643 ah tuilian an tuar a. Mi nuai 1 sing 6 leh sang 5 chuanguin hmun himah sawn chhuah tawh an ni .Arunachal Pradesh ah ruahsur avanga chhiatna thlengah mi 12 an thi tawh a.

India Meteorological Department (IMD) chuan hmarchhak pumpuiah orange alert a puang a ni.

(Newsonair)



DELEGATES

Sawrkar laipui tirh Parliamentary Delegates 7 zinga pahnihte chuan nimin khan India an lo thleng leh tawh a. Team pahnih lo haw te hi DMK MP Kanimozhi kaihhruai leh BJP MP bajjayant Panda Kaihhruai team te an ni a.Hlawhtling takin an ram tlawhah te Indiain firfiakte a duhloh zia leh a do zel tur thu an hrilh darh a.

Kanimozhi team te hian Apain, Greece, Slovenia, Latvia leh Russia te an tlawh a. BJP MP Panda team te hian Algeria, Saudi Arabia, Kuwait leh Bahrain te an tlawh a ni.

(Newsonair)

